

Cu Hildward Croes como su presidente

Musiconan Uni ayera a forma asociacion di musica "MUSICA ARUBA"



ORANJESTAD – For di ayera tardi, e grupo di musiconan uni tin un nomber y asociacion nobo, conoci como MUSICA ARUBA. Esaki ta e asociacion nobo cu lo reemplaza ASOMA, pero cu mes momento ta completamente los di e asociacion bieu. E grupo di musiconan uni ayera merdia a firma nan acta y oficialmente a bira un asociacion structura cu tin cu bai bringa pa derecho di tur musiconan na Aruba. E grupo aki, te cu antayera ainda operando como 'musiconan uni' lo continua

opera awor cu nan nomber oficial, MUSICA ARUBA. Mes momento su presidente Hildward Croes a confirma cu MUSICA ARUBA lo sigui cu e 'negoshacionnan' cu mediado di gobierno y SAC y lo no papia mas pues como musiconan uni sino e asociacion MUSICA ARUBA. Manera tur asociacion oficial lanta serca notario, tin su regla y directiva. Den caso di MUSICA ARUBA, esaki tambe ta e caso. Hildward Croes cu a fungi como e vocero di e grupo di musiconan uni, a keda

apunta como e presidente, sigui pa Inky Richardson cu ta secretaria, Sergio Barros ta e tesorero, y ta sigui e directornan cu ta Clyde Burke, Bobby Gibbs, Ruben Trapenberg, Edwina Werleman, Juraiana Merencia y Anthony Gario.

E intencion segun Croes a splica BONDIA ARUBA ta cu nan lo bringa pa derecho di tur musiconan, tanto esnan cu ta den bandanan local, bandanan cu ta toca na hotel y tur otro asunto cu ta rekeri atencion pa musiconan na Aruba. Mes momento e la clarifica cu esaki no ta e ASOMA nobo, y no ta un continuacion di loke a resta di ASOMA. "Nos ta completamente los di ASOMA. Nos no ta ASOMA nobo. Nos ta algo completamente nobo" Croes a bisa. Esaki pa kita tur duda cu por tin riba e asunto aki.

Croes ta contento cu e union spontaneo aki a conduci na un asociacion structura cu awor lo mes-



ter por defende derecho di tur musiconan. Algo cu hopi tempo no tabatin, cu tur su consecuencianan cu e por tin. Si tuma nota cu na Corsow p.e. tin AMAK cu danki na su seriedad y structura profesional, a pone cu nan por organisa eventonan manera Tumba Contest cu ta genera miles na premio y ta beneficia netamente e musiconan participante. Ta spera cu fuera di actividadnan carnavalesco, por

continua cu trabounan pa sigura e representacion serio di e musiconan. Por bisa cu tur tranquilidad cu 'no hay mal que por bien no venga' pues algo bon a sali for di e problema di impasse entre SAC y e musiconan.

Mes momento Croes a muestra cu no tin ningun novedad riba e asunto di Calypso Contest pero ta spera cu cos keda regla pronto si. □

Mediado di Gobierno a confirma na BONDIA ARUBA ayera nochi:

Awe SAC ta duna mediado nan contesta final riba impasse

ORANJESTAD – Awe SAC ta duna mediado di gobierno un contesta final riba e proposicion cu a bin cune ayera tardi laat. Esaki ta palabra di mediado di gobierno Anselmo Pontilius ayera nochi na BONDIA ARUBA. Segun Pontilius despues cu a topa ambos partido den curso di dia ayera, palabra awor ta na SAC pa nan acepta un propuesta di mediado.

Si esaki bira un hecho, lo reuni atrobe cu e partidonan y posiblemente awe lo por bin un fin na e impasse entre musiconan (desde ayera MUSICA) y SAC pa asina dicidi kico ta pasa cu e festival di Calypso, y tambe den ki forma por sigui.

Mediado di Gobierno a confirma cu partidonan tabata basta leuw for di otro y e disponibilidad di SAC no tabata grandi debi na tur e trabounan cu SAC tin cu

desplega tambe fuera di e reunionnan aki. Ta via contacto telefonico mediado tabatin contacto cu SAC y a muestra cu ta spera di curason cu cos por drecha y cu pa awe cos por keda cla. Ayera den curso di mainta e mediado a topa cu e asociacion di musica nobo MUSICA, pa despues e reuni na telefon cu SAC. Ayera tardi a topa cu nan atrobe y a bin tende di SAC cu pa awe nan lo manda nan decision final pa mediado cu despues tin cu bai topa cu e musiconan y wak si e musiconan ta bai aden cu e proposicion.

A confirma cu pa SAC e ta un situacion dificil mirando e loke a bin ta pasa y loke a wordo bisa. Lo tin cu bai hala atras di varios cos cu ya caba a keda palabra y regla y esei posiblemente ta e punto dificil pa SAC acepta, segun BONDIA

ARUBA a compronde. Pues por a compronde cu e bala awor tabata den tereño di SAC y cu awe SAC ta laga mediado di gobierno sa kico ta e situacion.

Di parti di Hildward Croes ta spera cu ainda por tin un of otro forma di por tin e festival cu nan participacion of algo por el estilo. Nan a muestra BONDIA ARUBA ayera tardi cu nan no a entrega ainda y como tal tin speransa ainda cu cos lo por sigui. Tin berdad un schedule hinca den otro cu lo mester a cuminsa diaduna awor cu prefinal di Calypso. Pero cu apenas 2 banda y 5 cantica, no tin necesidad pa tin un preseleccion.

Cu e decision di SAC y despues e intermediacion di mediado, ta spera cu den curso di awe si, e solucion bin afo, sea cual sea esaki. □